



汲園自訂

梵廬中集

善學齋藏板



序

古詩之傳於後者大約有二登臨之作易爲幽竒
懷古之作易爲悲壯故高人達士往往於此抒其
懷抱而寄其無聊不平之思此其所以工而傳也
太原兄弟以詩名江左二十年矣順治中予與端
士同舉禮部繼又識異公懌民藻儒諸子與予譚
藝悉合獨未識虹友以爲憾今年夏相遇京師握
手極歡出其據青集一卷所謂幽竒悲壯二者殆
兼之矣予昔在江南嘗數至金陵一至吳郡凡是
集中所稱鍾山鷄籠牛首靈巖穹窿諸勝率爲游



履之所經歷登臨懷古亦時時見諸篇什而言語之工不逮虹友遠甚則才不才之殊不能強也中間獨虞山予所未至然予嘗奉使萬里出劍閣經夔道奔峭插天青冥無極感公孫以來割據成敗之跡而嘆天險之不足恃虹友虞山詩云吾聞蜀道有劍門江山形勝極險壯又云方今蜀道多兵戈萬壑千岩氣悽愴其感深矣虹友未嘗至蜀而其言如此予身至之而不能言然則才之相遠又豈可以斗石計哉因書卷後而歸之以信夫是集之工必傳於後世無疑也康熙丙辰六月濟南愚

兄士禎序

語云得一人知死可不恨知重矣哉而尤視乎知之者之人余於詩茫無所得未窺古人之藩籬安問堂奧家兄阮亭司農固世之善爲詩自明迄今三百餘年所未有者也猥蒙賞識心竊怪之而亦以自喜嗟余老矣旣不能殫精神窮日夕從事于斯以俟其少進悉取而焚之爲藏拙計得矣一生心力蕩焉而無存則又可惜由是深悔少壯之不學白首無聞以至於此將使子若孫鑒余之失而知奮也爰鋟板以問世方

今文章家豈緊無人詩中三昧得之者惟兄在
詩言詩不請兄序而誰請哉茲特序余據青集
者乙卯以後之作不在是焉顧全序尚未乞得
仍用弁之於首他日或另易一序或兩序並行
皆無不可非謂兄謬知余藉是以炫世也聊存
有聖者依歸之意云戊寅夏五王攄識

蘆中集目錄

卷一

古今體詩七十五首

卷二

古今體詩六十一首

卷三

古今體詩六十八首

卷四

古今體詩六十一首

卷五

古今體詩六十七首

卷六

古今體詩七十首

卷七

古今體詩七十九首

卷八

古今體詩七十五首

卷九

古今體詩六十八首

卷十

古今體詩七十一首

蘆中集卷一

一起丙申二月
盡庚子十月

登陽山

太倉王攄虹友著

捫蘿數里逐松聲
羣峭摩空類削成
海日自明無曉夜
山有浴日亭湖天不盡有陰晴
一泓下注龍湫伏
千仞橫開箭闕平
坐覽衆山凌絕頂
長風吹起暮愁生

吳梅村夫子鹿樵草堂成却賦

昔聞履道里今到輞川莊
丘壑看皆美風流久未
亡花深藏略約月好近
滄浪滿徑栽松遍猶尋種



樹方

侯掌亭移居吳門賦贈

十年多難嘆飄蓬吳市移家隱桂叢不用車中藏
季布將從廡下賃梁鴻一門忠孝青燐聚百戰城
池白骨空猶有先人敝廬在練祁南望哭秋風

落花十首

春盡園林滿目愁傷春一半似悲秋非關薄命甘
投井總爲多情學墮樓百里錦江烟淼淼千年玉
洞水悠悠飄零莫更吹羌笛恐有征夫怨隴頭
昨朝猶見最繁枝頃刻開時便落時難忘踏青嘶

騷衷強憑浮白醉醱醱錦衾寂寞佳人夢甲帳飄
零故國思安得長繩將日繫韶光留半去遲遲

柳絲榆莢共飛揚墮地紛紛墮馬粧未減故情猶
宛轉將成久別更顛狂滴殘思婦閨中淚斷盡王
孫客裏腸只道隣家開未了偷窺還擬上東墻

春事闌珊去幾分秋千院落閉斜曛馬嘶陌上迎
征轡燕蹴筵前亂舞裙那得返魂常化蝶總教入
夢亦爲雲南華一卷焚香坐撥觸傷心祇爲君
滿林紅雨落還晴水面文章縱復橫相送可堪歌
緩緩臨岐無那賦行行珠簾畫舫春三月銀燭金

尊夜五更轉眼已成蝴蝶夢崔塗詩句最傷情
東西飄蕩費追尋脈脈離愁不自禁綠欲成陰看
漸少紅貪結子踏還深逍遙似作莊生夢放逐如
言楚客心覆水情知難再滿相思猶誦白頭吟
俄拂朱簾更畫橋乍飄金屋又蘭橈也應哽咽歌
長恨無復輕盈舞細腰荀令爐邊香欲散梁王苑
裏雪初消相思只在江東路泣向寒烟弔二喬
片片長隨逝水東繁華如夢六朝同西窓夜雨題
詩處南浦春愁送客中玉笛幾迴聲轉切金鈴從
此響俱空枝頭一夕都吹盡誰向高臺唱大風

從前羯鼓悔頻催今日窺園興盡回莫怨風來偏
易落原知春去不長開紅顏已斷三生約玉骨難
沾半點埃過客光陰勤秉燭何須騎省重興哀
蕭蕭風雨閉閒門千樹今無一樹存女伴踏非前
日路牧童指失舊時邨徘徊欲作江淹賦悽惻難
招宋玉魂合向維摩叅此義色空空色更何言

採蓮曲

南湖涿水澄鏡光採蓮女兒艷紅粧爭持桂槳蕩
中央浪花驚起雙鴛鴦鴛鴦往來碧波上寧肯雌
雄兩分張此時採蓮女欲採還思郎搴花願比妾

顏好折藕願如郎意長君不見館娃宮殿千門起
醉舞嬌歌歡未已憶著吳王宮裏人宵來淚迸橫
塘水

謁伍相國祠

蕭條古堞樹棲烏載拜祠門落日孤報父有心終
覆楚殺身無計可存吳英雄寂寞留陳蹟山水蒼
涼失霸圖回首荒臺麋鹿地屬鏤遺恨滿姑蘇

題甘露寺狼石

一拳怪石枕江流此地孫劉昔共遊豈有同心扶
漢室空令遺恨在荊州英雄寂寞青山晚臺殿蕭

條碧蘚秋獨立殘陽弔三國眼前興廢總堪愁

登多景樓

南徐形勢險感慨一登樓山繞天疑墮江橫地欲
浮論兵留舊石狼石即在樓之旁在望失神州劉改之登此有中
原在望莫登樓句
不盡蕭梁恨西津水自流

江行

小舸依沙進江風葉戰酣萬山連楚蜀一水障東
南白湧兼天浪青浮蔽日嵐平生貪覽勝此景未
曾譜

夜歸京口

萬里平如掌輕撓破浪文江聲半帆月塔勢一峰
雲燈火城中見星河樹杪分更樓夜吹角嗚咽不
堪聞

胥口渡湖

孤櫂出胥江波濤何洶怒彷彿舊精靈乘潮自來
去驚波撼日黃舟楫歎危屢放眼坐篷牕快意了
無懼空濶天地開竒肆湖山聚波心澹蕩雲岸脚
微茫樹一片蘆花明落霞映孤鷺款乃發中流漁
邨烟欲暮未來領竒觀始悔生平誤美景相盤桓
一帆又飛渡

遊翠峰寺

峰腰開古寺寺以翠峰名樹覆經壇滿雲依佛座
生湖光搖壁冷山色擁樓明薄暮聞僧梵松風一
路清

宿法海寺僧房早起

為貪蘭若勝來宿贊公房鳥語曉烟濕竹風清磬
長牕虛延谷響林缺出湖光此地真幽絕堪令盥
櫛忘

登莫釐峰

丹梯天半強躋攀山外湖光湖外山日暮振衣千

仞上青螺幾點小人間

渡湖東還

湖頭風色正侵曉放歸船樹密諸峰合雲開一塔穿亂流紅葉雨輕浪白鷗天過盡重回首青山倍黯然

詠雪次東坡韻二首

片片驚飛密更纖紙窓蕭瑟曉風嚴花飄肯信天

無樹

唐太宗詩無樹獨飄花

蝶舞徐看地有鹽

梁簡文詩鹽飛亂蝶舞

不為

韜霞常亘野似能助月恰生檐關山凍合知多少試問峨眉剩幾尖

千林積素斷歸鴉出戶皚皚漸沒車夜色也應分片月寒心原不妬飛花幾迴晚渡迷漁艇何處春旗認酒家聞道灞橋詩思好朔風驢背手頻叉

送顧伊人之宣城

歲暮不堪別北風吹鴈羣衝寒一帆去飛破宛溪雲

喜晴

喚雨鳴鳩又喚晴微風池館竹梧清仍留烏兔天心轉故使蛟龍地軸驚書卷只今休引睡郊原從此不妨耕明朝放棹湖邊去新水新烟最有情

周參軍挽歌

盧龍塞外傳烽赤南北交馳紛羽檄專閫曾無退
敵謀中朝竟乏安邊策參軍自是江東俊夙有雄
名動邊鎮公車四上嘆蹉跎十年幕府成霜鬢是
時相國高陽孫文正公視師歸落日轅門斷烏飛亟為朝
廷訪竒士相逢抵掌論兵機指陳切中當時事誓
展區區靖烽燧重鎮仍張細柳軍窮邊再拓樓煩
地相國得公喜且驚語公真足倚長城廣寧棄後
成甌脫賴爾邊陲早息兵苦心正擬圖恢復蜚語
牽連堪慟哭可憐未請終軍纓翻教早繫鄒陽獄

事解踰冬遂趣裝旃裘重犯塞垣霜橫戈馬上吟
詩慣磨盾燈前草檄忙時有瞽人事游說彈罷琵琶
帳中醉往來挾款啗當途廟堂自此持和議紛
紛謀款蠟書來一日關門到幾迴抗論如公終不
用惜哉沙漠老竒才詔下軍前督戰頻樞臣議論
只逡巡當時五利今安在始信朝中盡瞽人公知
國是多乖誤江潭歸夢思鷗鷺不復青油幕裏遊
一鞭急返江南路穩卧林泉僅六年興亡轉眼泣
銅仙閉門且讀譙玄易嗜酒還逃蘇晉禪未幾緱
嶺吹笙去志業平生在何處坎凜空嗟骨相屯驅

馳苦恨遭逢忤江上荒阡有道碑西風宿草不勝
悲中原滿眼新亭淚併灑蕭蕭挂劍枝

和吳漢槎就訊刑部口占韻

才高豈是鳳池鳩何事銜冤涕泗流海內正憐余
失侶天涯誰料汝爲囚尊逢獄吏應知懼經授園
扉不解愁太息無人延國士昭王臺廢已荒丘

和陳其年題紫雲小影二首

灼灼芙蓉臉際開前身原是紫雲來今朝畫裏分
明見一夕揚州夢幾回

鬢影衣香潑墨成丰神綽約掌中輕花前試展生

綃看不枉陳郎一段情

擬唐人送宮人入道

十載昭陽按玉箏願餐雲液學長生牽牛尚記當
年事調鶴難禁此日情秋草宮中歌扇冷晚風壇
上羽衣輕遙知緱嶺今宵月無復羊車入夢聲

聞漢槎謫戍寧古塔

欲叩君門萬里賒驚聞遠謫度龍沙文章只道金
難鑠謠詠翻成玉有瑕減死蔡邕方出塞哀時庾
信未還家可憐交橐歸來日豈有明珠載一車

訪眉照上人

茅屋時時憶已公閒來步履訪城東久知入道非
由幻始信工詩未是窮門掩簷管禪室靜窓臨
齒佛香通林鴉向晚催歸去欲問楞伽惜未終

擬唐趙承祐昔昔鹽二十首

垂柳覆金隄

二月金隄柳柔條千萬枝含風長婀娜拂雨更參
差舞態縈愁日顰蛾歛恨時玉關人未返莫向笛
中吹

薜蘿葉復齊

惆悵王孫去春來葉復齊烟輕長冉冉風煖正萋

萋祇許迷歌袖偏能送馬蹄故夫不可見望斷白
狼西

水溢芙蓉沼

灼灼芙蓉艷風翻曲沼中葉侵歌扇綠花妬舞裙
紅浩淼菱歌出微茫桂楫通涉江猶不遠采采意
何窮

花飛桃李蹊

桃李無情樹春來亦自花香飄羅幕遠影度玉窓
斜遊子青絲騎佳人金犢車折時那可贈辛苦卧
龍沙

采桑秦氏女

嬌小秦樓婦城南獨采桑
鈎輕宜葉細腕弱怯枝
長徙倚金鞍側躊躇翠蓋旁
相逢莫相謔夫婿侍
中郎

織錦竇家妻

不知竇家婦織錦意如何
舉袖風生腕停機月照
梭歡情交縷細愁緒亂絲多
願駕天孫鵲逢秋却
渡河

關山別蕩子

關塞渺無極征人去不回
腸應今夜斷書是幾時

來月苦鴻難度沙昏馬亦哀
君王還戍詔何日下
輪臺

風月守空閨

關山悲久戍寂寞繡閨空
帳掩茱萸月牕虛玳瑁
風曉眉橫鏡綠宵淚落衾紅
遙憶臯蘭北音塵詎
可通

恒歛千金笑

蘭閨恒歛笑芳信轉蹉跎
薄媚含悲久微羞蓄恨
多向燈愁半額窺鏡蹙雙蛾
化作山頭石相思可
柰何

長垂雙玉啼

垂淚何時已天涯久未歸恨容潛落粉愁態暗露
衣枕上吞聲慣人前掩面稀青陵臺畔蝶生死羨
雙飛

蟠龍隨鏡隱

愁思空閨曉塵昏寶鏡遮慵看釵上燕羞覩鬢間
鴉窺匣蛾眉斂開奩玉筯斜恐驚憔悴盡雙照待
秦嘉

綵鳳逐帷低

繡戶張羅幕雙飛綵鳳輕因風晨自舉映月夜能

明已隔尋思態難遮掩泣聲秦樓曾跨此無限合
歡情

驚魂同夜鵲

耿耿懷人夜魂驚與鵲同滴愁漏水碧燃夢蠟鐙
紅繞樹棲難定填河恨不窮空房成獨守一種斷
腸中

倦寢聽晨雞

喔喔聞雞夜孤眠感易生不知萬里別每到五更
鳴羅幌風侵暗蘭缸火徹明此時沙帳北起舞獨
何情

暗牖懸蛛網

暗中蛛網遍時見綺牖懸烏鵲空傳喜菖蒲遠寄
牋織愁來月下牽恨出風前寂寞龍鬚席從教抱
影眠

空梁落燕泥

春日差池燕銜泥落畫梁高樓迎曉入曲戶映花
藏爾已來炎海人猶滯朔方可憐雙宿好偏在莫
愁堂

前年過代北

憶昔經過地風沙代北寒為憐妾腸斷重念客行

難雨雪邊城苦弓刀戍卒殘迢迢千萬里憑夢到
長安

今歲往遼西

何年返征旆今復向遼西未見收邊郡空聞事鼓
鼙笳吹關月迥烽舉塞雲低怪底從無夢黃鶯徹
曉啼

一去無還意

去去音塵絕遙遙阻玉關窮兵成白首愴別損紅
顏都尉歸無計燕然勒未還不知征戍者曾否念
刀環

那能惜馬蹄

相思腸斷久歸路馬蹄遙絕塞終無信空閨不自
聊威名竇車騎功業霍嫖姚莫話圖麟閣竒勲未
易邀

隴頭水

隴頭水嗚咽嗚來經狐塞去遶龍城滔滔勢若天
河傾但能流恨不洗兵烏頭有白日水流無終期
水流無終期斷腸待何時李廣功高竟不封塞垣
千古泣英雄獨留隴底無情水長逐秦川日夜東
日夜東未有已愁殺人隴頭水

贈梁翀霄總戎

關隴英名久著聞東南專閫策竒勲戈船早樹橫
江幟水寨還張下瀨軍半夜彎弧沙島月三秋吹
角海天雲不知誰向蓮花幕爲草袁家倚馬文

西洲曲

三月楊花飛八月桂子落望郎郎不歸帶圍日寬
却郎今在何處作客西洲去打槳畏風濤春江不
可渡妾家住橫塘菡萏門前香朝朝弄芳沚妬殺
兩鴛鴦鴛鴦綠蒲中花光相映紅採蓮從女伴笑
入荷花叢隔花共人語玉腕花間舉但採同心蓮

莫覲同心侶無處覓同心天涯別至今歸來理瑤
瑟脉脉相思深相思那可道羅帳風侵曉一夕九
迴腸紅顏鏡中老顏色已驚秋刀頭肯念不高樓
日以望何處是西洲江湖渺難越願郎峭帆發不
見西洲人夢遶西洲月

過潤州有感

經行鐵甕思依依滿眼蒼涼木葉飛秋草客來官
道改夕陽人向戰場稀孤城寂寂愁聞角荒井蕭
蕭見掩扉綠水橋邊酒樓上誰能對景不沾衣

至白門

白下舊山川蕭條又一年秋風經戰壘野哭滿江
天草木餘兵氣村墟少爨烟空聞嗚咽水滾滾石
頭前

秦淮閒泛

扁舟蕩漾遶城隅千載傷心水一區總爲笙歌貪
勝賞遂令廟社失良圖衣冠晉代今安在烟水秦
時尚不殊亡國已非南渡日也如西子比西湖

教坊老叟行

教坊烟草萋萋碧窮巷無人席門窄憔悴堪憐白
髮翁飄零却遇青衫客自言先世本含香出入金

門侍漢皇慎簡循良二千石恩綸趣令赴岩疆一
麾出守新安郡五袴歌謠聞遠近靖難兵來勢震
驚須臾忽得金川信到處關山急羽書嬰城死守
待何如孤軍力盡重圍裏不食睢陽一月餘蟻子
虬蟬援俱絕城亡化作萇弘血妻子哀哀入教坊
湘江竹泪痕難滅狼籍胭脂付北風鐵家二女怨
應同已甘身死覆巢下只恨名編樂籍中樂籍編
來三百載門前車馬紛成隊對客歌傳屈柘詞當
筵舞學驚鴻態我有二女顏色殊芙蓉爲面玉爲
膚善和端端不足數一時冶麗傾南都蒼黃京闕

風塵起鑿輿來自銅駝里此時將相戲樗蒲此日
君王醉羅綺歡樂君臣未一年驚看四海遍烽烟
朝廷但議防蘇峻將帥何人似謝玄蕭蕭北伐旌
旗仆南國衣冠總非故可憐晉祚盡昌明千載傷
心五馬渡回首長干嘆落花青樓無復舊繁華寧
爲漂泊琵琶婦不向宮廬聽暮笳扁舟來到金閭
住碧窓十二櫻桃樹一女東方遇使君許將油壁
迎歸去去向朱門不可留枝頭連理忽驚秋那知
纔逐吹簫侶又早題詩燕子樓北邙松柏招魂哭
自此焚脩奉西竺禪榻長繡貝葉經歌臺罷理揚

花曲一女蘭橈飲碧潯座中公子最知音豪華自
是平津舊不惜纏頭費萬金白楊瞬息悲風動落
紅無主埋殘壠寂寂空傷行客心哀詞題遍真娘
塚細數從頭淚滿衣誰能聽此不歔歛乾坤板蕩
家何在骨肉存亡世已非我聞翁言長太息我有
哀情更悽惻翁且吞聲泣路隅珠襦玉匣悲何極
漢武銅盤事已遙驪山湯殿久蕭條當時曾說冬
青恨亦有愁魂與共銷

十五夜對月

久客秦淮月他鄉白下舟一年惟此夜萬里共中

秋濩落慙佳節飄零感敝裘離家圓兩度吟罷不
勝愁

舟泊惠山

山啣斜日亂鳴蟬有客維舟古寺前暮色半空生
翠靄寒聲百道落紅泉地逢好景淹杯酒人在他
鄉厭管絃尋到松間題壁處舊遊回首已三年

秋雨

獨掩茅齋黯不晴雲陰遮盡北窓明已驚入夜床
琴咽稍喜經秋徑草生帶葉暗添檐外響因風亂
滴竹間聲此時何事能消遣賴有芭蕉種得成

潮音菴聽講賦贈槃公和尚

尚方曾請劍高座正談經故國荒禾黍孤忠炳日
星鶴隨飛錫至鴿集寶旛聽講罷禪關掩秋陰月
滿庭

上陽白髮人

上陽宮中白髮人潛閉空宮幾十春自傷憔悴容
華晚爲道淒涼愁思新憶自良家初中選便應複
道承恩遍奉帝名雖在後庭卷衣身未臨前殿薄
命休教怨畫師心知見妬爲蛾眉祇緣趙后方專
寵遂使班姬早賦詩從此玉階往來道履綦斷絕

無人掃夢裏羊車寂不聞愁中鸞鏡羞相照鸞鏡
羊車恨若何朝朝暮暮感雙蛾君恩未賜羅衣在
妾淚空沾翠袖多獨有楊妃擅嬌貴煽成中外薰
天勢寵極寧知蠱惑深變生不免蒼黃棄可惜豪
華車鬪風海山道士覓何從花開花落芳魂杳年
去年來逝水同萬乘南奔由女禍歸來滿目傷兵
火雨打梨花輦路荒風飄槐葉宮門鎖永巷沉沉
朝復昏自從天寶至貞元傷心怕聽銅龍咽繫臂
愁看絳縷存每爲前魚動悽惋何如萬國遭塗炭
白髮于今不足悲紅顏自古多成亂尚書賜號已

多年重對青銅意惘然粉靨已非嗟老至綠鬟安
在憶兵前傾奪由來自宮掖九天咳唾誰能必總
傷秋草是今朝幸未春花在當日晝靜紗牕生網
塵流螢羅幌夜飛頻雖然同抱長門恨猶勝黃金
買賦人

長相思

相思渺無極黃葉滿蒼苔安得生死不相棄人人
盡似青陵臺記得送行時慟哭別城隈如何火伴
歸不見附書來庭前紅槿花尚能朝暮開獨有黃
河水一去不復迴不若不相見相見情更哀不是

不相思相思心已灰君不見秦時百萬築城卒紛
紛白骨埋蒿萊

鴈字四首

瀟湘木落幾行回點綴青冥萬卷開頓使江山皆
禹穴不愁天地有秦灰蘆洲月滿銀書出榆塞霜
明玉篆來若見羣飛麟閣畔校讎還待子雲才
楓落吳江影入雲羣鴻戲海正紛紛初疑遵渚臨
池意徐識啣蘆倒薤文飛錯豕魚還易辨書成鷄
鷺竟難分遙從隴首瞻銀漢道是羊欣白練裙
金風吹葉見南翔上下聯翩筆陣張收拾羽羣親

翰墨挽回兵氣出文章橫空競指秦碑在隱霧全
疑魯壁藏彷彿子山詞賦好江關流落未還鄉
鳳翥鸞軒去不停驚看天半漸冥冥橋邊掩映疑
題柱石畔迴翔擬勒銘秋淨崩雲來遠岫夜深垂
露下寒汀南朝無限傷心事一一憑君記汗青

贈黃孝子端木

蕭蕭襖被出吳關遙訪庭闈鬢已斑故國十年征
戰裏衰親萬里夢魂間瘴雲路繞盤江去蠻雨人
浮洱海還正是萊衣歡笑日不堪回首碧鷄山

喜吳弘人聞夏南還

相逢只道此生休解網歸來話昔遊幸免無家投
朔漠那堪有弟作纍囚雲山漸慰思鄉夢風雪仍
含出塞愁不覺喜深悲轉集潺湲雙淚爲君流

紙花

弱蒂盤絲也自紅托根疑在剡溪東折來不覺香
全褪看到方知色本空纖手製從粧閣裏春心生
向剪刀中任它蜂蝶誰能採簾外休驚少女風

蘆中集卷二

起壬寅二月
盡乙卯四月

太倉王攄虹友著

虎丘僧舍玉蘭

古樹何年種名花淨域開
紛披映山閣爛熳傍經
臺素艷凌空出殘香拂袖回
泠泠鐘磬裏飄向下
方來

後山晚步

散步春林晚蒼苔細路重
一鐘清衆壑羣木秀孤
峰行盡磴猶曲語窮僧更
逢興來不覺暝吟倚澗
邊松

三月望日錢遵王招集拂水山莊同馮定遠錢夕公鄧肯堂許九日王惟夏次谷顧伊人兄芝屢隨菴巢松即席分得一東

傍巖雲樹入空濛客至堂開罨畫中百尺泉飛山閣雨一番花信酒樓風市朝遷變名園在觴詠招尋勝侶同盛事應知傳太史今宵星聚尚湖東

弔松圓詩老

詞客開元孟浩然耦耕小隱尚湖邊秋牕潑墨來山雨夜閣吟詩落澗泉花信不堪尋舊蹟

傷菴舊居花信樓

浪淘長自讀遺編今朝追憶東風裏寂寞人琴二十年

十六日牧翁夫子招同朱長孺錢遵王許九日王惟夏次谷顧伊人家兄弟集胎仙閣是日夫子題先文肅南宮墨卷首倡四律敬和原韻

空濛山閣雨霏微春盡殘紅檻外稀遂有壺觴留竟日乍操几杖款雙扉花香錦里新詩卷草色磻溪舊釣磯聞道掩關方結夏將從初地問傳衣落落晨星嘆掩芒風流無恙浣花堂石渠舊署存

三史玉冊遺忠紀四王筆墨西清雄藝苑衣冠東
夏老詞場可憐已墮虞淵日駐景猶思奮魯陽
丙魏遭逢歎未如苦心論定待懸車品題價重千
秋後卷牘榮加五世餘今昔高情增感慕人文淑
氣見扶輿愧無佳句酬鴻筆勝事流傳異代書
促坐飛觴雨色新殘山今日送殘春風塵道合尊
龍卧身世愁難望蠖伸酒後情懷殊慷慨亂餘詩
句總悲辛桃源即在人間世願逐漁郎一問津

送文介石先生歸滇南

烽烟初息碧雞關行色匆匆慘別顏故國已無三

戶在殘年猶得一身還石頭亡後衣冠盡金齒歸
來道路艱知與兒孫相見日幾回長慟哭匡山

題王石谷倣黃子久富春山圖

王生丹青天下無開縑示我富春圖富春山色何
縈紆尺幅似有羣龍趨此圖相傳自子久變化縱
橫無不有真蹟幾隨劫火飛臨摹乃出王生手王
生寫此心神開置身如在嚴陵臺琉璃萬頃蕩空
碧江天瑩淨無纖埃一峰突起一峰伏忽為巉巖
忽平陸時有白雲相吐吞遠勢盤挐駭心目夕陽
紫翠明中流蘆花捲起空江秋望來紅樹不知數

掩映其間雙白鷗灘水粼粼清見底渚復岡重秀
莫比山坳路盡漁舟來遊人如入桃源裏方干墓
下草芊芊戴顓仙處千峰連山水不殊人代改使
我坐對心茫然嗟哉生平遊未得此景新從畫中
識明日蓬窗縱目觀毫端方信無差忒我父繇來
嗜大癡謂其意匠無人知王生師古妙入髓獨與
此老爭神奇此老當年尚湖住王生生長亦同處
豈是前身與後身大都得自山川助聲價不獨重
此圖絹素久已馳名都真于斯道開榛蕪嗚呼王
生丹青天下無

懷許九日

聞君纔上摘星樓又到濡須塢口遊勝地山川曾
百戰故人烟雨只孤舟蒼蒼楚水蒹葭晚漠漠江
田秔稻秋應有陳蕃懸榻待免悲王粲滯荊州

與楊仲延家阮亭
二公倡和最合

懷芝廬兄

孤山寺下水溶溶卷幔湖樓錦繡重花裏自從三
月別夢中幾度六橋逢雨來泉脉通龍井雲起山
光亂鷺峰歸日餘杭攜美酒解愁憑仗醉千鍾

喜王惟夏北還

夔屈緣何事嗟君復壯年狂名當世滿傲骨耻人
憐窮許工詩句貧誰與酒錢歸來燕市日相見各
潸然

呂城病歸

掛席西風桂槳輕扁舟又次呂蒙城身如枯葉方
愁落心似殘潮未肯平宿雨河橋橫酒旆曉烟村
店聚雞聲故園歸去無多路每念勞勞重愴情

重陽日偶成

歸來兩度逢佳節強欲登高病不堪落照孤鴻如
畫裏負他秋色住江南

送石葉上人楚遊

瓶鉢隨緣去荆南道路重躊躇爲此別飄泊幾時
逢得句霜生劍安禪雪滿峰玉泉吟眺處猿嘯出
雲松

懷吳漢槎

絕域龍沙外孤身雪窖中故鄉無路到嚴譴幾人

同

與同遣戍者時
已相繼南還

放逐真何罪羈離且固窮休嗟萬里

濶來往仗詩筒

青溪道中初霽

疎雨含風止復生薄雲漏日半輪明九峰烟紫橫

秋暮十月江寒變晚晴雁起蘆花波面影鴉翻楓
葉櫓邊聲遙看泖氣荒荒白欲放扁舟鏡裏行

登橫雲山望泖

怪石巒岒翠欲齊芒屨乘興一攀躋孤亭路出龍
宮上半山有白龍洞清磬聲來鷲嶺西靈鷲菴在西麓三泖雲開平楚

盡九峰木落暮天低當年老鐵狂遊地漁笛臨風
客思悽

方公祠

蒼蒼檜柏出烟蘿寂寞荒江少客過竹馬風流傳
父老銅人涕淚感山河衣冠故國沉灰久俎豆空

堂竄鼠多今日淒涼祠下拜黃巾白馬恨如何

過雪堂精舍

為愛名山蠟屐登蒼烟一逕入疎藤鐘魚下界飄
仙梵花木閒房映佛燈絕壁翠遮天半面清池紅
覆葉千層誅茅我欲移居此折脚鐺邊伴老僧

讀侯掌亭遺集感賦

篝燈一卷坐深宵歎息斯人已寂寥盡道文章緣
夢鳥豈知涕淚在吹簫姓名梅尉狎狂變孤憤虞
卿著述消慟哭與君成永訣酒壚零落到今朝
同沈台臣宿吳省初齋夜話

世事驚心盡清談喜共君庭寒生薄霧樓迥宿微
雲朋好歡何劇乾坤變屢聞酒殘方月落簾外白
紛紛

臨池歌贈三山黃處安

陳倉石鼓讀難曉嶧山苦縣學者少字體亦隨時
代更古法誰復窮幽討八分漸變隸楷出厥後鍾
王造其極或爲雲卷或烟霏變化毫端妙莫測貞
觀以後唐諸家銀鈎體勢無欹斜其間肥瘦不一
格要皆用筆如畫沙嗚呼諸公不可作此道於今
久寂寞石鐫木刻盡失真贗手鈎填腕力弱閩海

黃君善師古故鄉千里烽烟阻興來舐筆坐山窓
忘却蕭然在羈旅經年浪跡依吳關忽泊扁舟婁
水灣相貽墨妙光凌亂儼看彝鼎商周間發函展
紙驚相向淋漓盤蹙何神王有似行間書一聲驚
鸞舞鶴排雲上黃君諸家無不兼獨於羲獻尤精
研點曳裁成有殊肖知其取意得自然我家名蹟
曹娥碑久藏篋笥生光輝老人寶之用娛老惜今
已棄恒歔歔槩几湘簾坐對此眼底落花千片起
滿堂動色嘆入神昔之曹娥無乃是當年葬紙昭
陵中二王真蹟人間空此冊若前千餘歲應隨玉

盃埋秋風宵來足敵千將氣隱隱光騰斗牛際鄭
重封題什襲藏得此法書空一切

輓龔宗伯芝麓先生

驚聞朝野共汎瀾太息今誰策治安時論十年需
作相人心四海望加餐孤寒淚覺崖州少鈞黨名
全漢世難弟姪師門慙未報感恩中夜欲摧肝

觀鶴尹兄玉階怨戴花劉新劇

促席明燈夜未央新翻樂府奏霓裳死辭玉枕題
秋扇老跨青牛覓醉鄉畫裏蛾眉緣失路花間鶴
髮為高堂慙余亦有昭陵淚不共斑衣舞一場

喜許九日閩歸

越王臺畔晝橫戈有客歸來涕泗沱我問甌閩君
問楚亂離相對一悲歌

過拂水山莊登秋水閣感賦

灤西風景未凋殘暇日登臨獨倚欄雲氣湖天生
晝暝鳥聲山閣破春寒十年已歎同遊盡

壬寅春遵王招飲於
此在座者定遠夕
公肯堂相繼徂謝

一任重追大雅難忍對林泉成寂寞
當時車馬駐江干

贈張帶三考功

脩然三徑卧烟霞桑海茫茫劫夢賒老去風懷高

士柳亂餘心事故侯瓜麻鞋涕淚猶唐代金馬文
章自漢家遲日山窓花影裏卷簾孤坐讀南華

帶老留飲紫蓋山房

竹間瀟灑絕塵埃卷幔青山入座來問字偶尋揚
子至開樽因醉習池回雨滋花片催詩句風引鶯
歌勸酒杯猶有襄陽耆舊在鹿門從此數追陪

雲間歸舟讀藻儒弟湖上近詩

草長平堤花亂飄芳泥十里馬蹄驕我方蕩槳遊
三泖君已吟詩醉六橋風遮林香禽語變衣沾山
翠酒痕消一編把向青燈側恍惚西湖柳萬條

昭復避兵浦東用表海叟浦上寓所韻懷

之

避地遙遙歇浦潯野田茅屋氣嘗陰江鄉索賦誅
求急海嶠徵兵戰伐深亂恐離家無樂土窮思愛
子有愁吟新晴峰泖堪乘興早晚扁舟或過尋

哭宋荔裳觀察

嚴裝新遣赴蠶叢又到京華踏軟紅遂有旅魂依
郭隗曾因遠宦訪楊雄兵戈萬里岷江月涕淚全
家雪嶺風添得行人無限恨杜鵑聲裏哭詩翁

觀碁歌

虛堂深沉垂翠幙坐對楸枰眼花落出入九天九
地間未容用意旁人覺疎簾清簟看分明良久纔
聞下子聲黃生瀟灑少年子此技海內方橫行自
言少小嗜於此每讀藝經呼不起凝睇沉思久得
之乃知小技有妙理臨局機勢誠無前鷹隼搏擊
當秋天或爲橫攻或潛躡時而穿腹時趨邊制勝
出奇無不有劉項此時皆束手險如鄧艾襲陰平
肅若亞夫營細柳坐間觀者歎絕竒拔幟呼螿人
不知古人陣法失已久鸛鵝魚麗今誰爲嗚呼黃
生胡辟易江北江南不逢敵豈是深山曾爛柯知

君前身采樵客謝公笑却淮淝軍相傳賭墅千秋
聞嗟哉謝公不復見世稱絕藝無如君黃生工此
亦良苦運用以心師以譜有人倘與論英雄未許
相輕嘆廣武名滿人間已十春憐渠國手困風塵
即今籌國多能手未必竒謀有此人

過王廉州湘碧染香菴次匡今兄韻

常懷丘壑美今一過雲林不到棲閒處誰知幽意
深花香書案積水氣石床侵始信塵寰裏仙源自
可尋

白鷺

家在蓮塘笠澤東平生踪蹟海鷗同立殘秋水露
華裏飛破曉烟山色中日暖曝翎依蓼岸雨寒拳
足傍莎叢瑤墀未肯乘風去留伴嚴灘一釣翁

讀許九日憶昨行感賦

身逐樓船去詩成幕府新老逢多事日窮作苦吟
人客禮疎狂慣交情感激真兩行知已淚生死隔
風塵

過沈荷百故居有感

寂寞空堂掩夕曛風流不見沈休文交親滿眼誰
知我生死關心早哭君花下藏鬪春墅雨樽前說

劍夜窓雲經過無限山陽感未許人吹短笛聞

同毛亦史夜泊半塘

微雪霏霏夜窮陰漠漠天因風斜入檻無月迥明
船浦冷魚驚火林乾鳥宿烟表安欣共載篷底擁
衾眠

除夕起用杜句

四十明朝過無端歲又新愁應添白髮窮且失青
春衣食艱生計關河滿戰塵團團今夜酒痛飲莫
辭頻

元夕

無燈寧廢飲有月儘堪遊
兒女深宵共關山幾處
愁爲歡時屢變憂亂意
難休酒罷添新淚相看滿
敝裘

元夕後三日同周子俶孝威王惟夏次谷
家兄弟集誦侯弟齋分得晴字

燈影波光激灩明分曹促坐到參橫
人逢舊雨渾忘醉天愛良宵略放晴
狼藉酒船浮蟻綠翩躚歌袖落梅輕
亂離莫道歡娛易況復流年暗自驚

席上疊前韻送孝威

離堂酒散月猶明相送河橋一葦橫
人意重爲千

里別春光偏作十分晴烟縈岸草侵袍淺風墮江
梅入棹輕不負平生趨幕府豈因戎馬客心驚

玉山行

昔曾披覽山海經乃知王母所居處玉山高高玉
水清中有丹鳳棲其樹豁然震澤東南開湖山一
氣相結聚地脉蜿蜒到海盡孤城蒼翠一峰踞秀
絕茲峰名玉峰其下亦有神仙住武皇今若宴瑤
池彷彿應尋此中去東海三鳳爭飛鳴小小下筆
江花生時方天子重文治廣羅學士登蓬瀛後
先射策金門下北溟變化千人驚五色雲中臚唱

畢爐烟紫映宮袍明伯仲第三叔第一合成鼎足
真難得盛事流傳古所無從茲翰苑生顏色爲問
苦心教者誰君家有母丸熊亟書聲午夜伴鳴機
青熒燈影秋河直容易聯翩 帝座旁兄弟成名
皆母力母今翟第何輝光遲日和風畫錦堂鳳聲
一片起寥廓雲間六翅齊高張須知鳳穴雛皆好
再見迴翔萬仞岡置酒開軒傍山麓孫酬子勸歡
亦足靈妃何處撫雲璈筵前滿耳鈞天曲簾卷山
光入座來聳翠流丹蕩心目似有仙雲縹緲飛霓
旌羽蓋紛相逐進霞觴兮歌玉山玉山宛在東海

間

圓妙觀彌羅寶閣成紀勝

高高紫閣赤城標霞綵繽紛跨碧霄龍節雲迎雙
闕靜鸞笙風落半空遙中天星斗懸窓戶下界乾
坤小市朝欲躡丹梯無路到石壇花影正飄颻
聞虎丘北數里村莊有山茶大可圍抱不
得往看賦此

竒葩競吐赤城霞偃蓋重重蔽日斜受氣暖仍依
厚地托根榮不借豪家尋芳豈厭孤村僻放棹還
愁十里賒想到一株金埒畔已無調馬只棲鴉

遊西園

石家金谷裏寂寞掩禪關
鳥散鳴鐘後僧逢洗鉢
間落花人事變流水道
心閒未接支公話精廬
獨還

楓橋望月

山寺曾同賞今看分外明
雙眸隨處豁萬象此時
清未穩驪龍睡須防烏
鵲驚舟中腸已斷更傍
戰場生

藻儒弟約遊支硎華山諸勝不及偕往志
悵

亂峰深處望氤氳人在籃輿積翠分
白社故應終老我青山誰道又輸君
孤烟落日村中樹遠岫長湖寺外雲
好景歸時須記取一帆東下悵離羣

維亭道中

春江亦澹澹空水蔚藍間近市湖平
岸推篷塔在山遠林行欲變高鳥去
如閒一路桃花雨飄飄共客還

南渡觀桃

迎人含笑却無言艤棹城南暖正繁
夾岸日光斲樹出連村霞彩倚風翻
那知喪亂還經眼祇覺芳

菲欲斷魂勝絕小橋流水畔愛他不是傍朱門

雨

瀟瀟霑幔濕浙浙打牕斜久旱邾愁雨方春應惜
花物情看草色生意在農家道路憂多梗衝泥未
足嗟

雨宿西田

結宇依蒼麓開軒面碧流興來乘漲入意愜及春
遊聽雨三更坐看花一宿留雖然妨秉燭蘿逕足
清幽

侯生行

練川相傳四夫子松圓詩律精嚴始其餘作者不
一家近來獨數侯生耳侯生落落心期真汝父平
生與我親已看卓犖成名士還想風流哭故人故
人笙鶴今何處憶昔吳趨坊底住江千車馬紛如
雲是時梁園盛詞賦燈火山塘畫舫紅不才末座
亦追從書籍謬將王粲與掌亭曾惠抄本二二種齒牙真說項
斯同宋公夢天去作金門客蜚語吳郎槎漢遭遠謫同
時知己各分飛故人歸葺城南宅弟勸兄酬樂自
如栽松藝菊滿庭除閒窓茗椀修山史小閣湘簾
讀道書少微一旦沈光彩宿草淒涼經幾載流涕

空成掛劍回傷心，忍對遺琴在多君。有志追先烈，
曉夜撚髭吟不輟。毫端瀟灑迥出塵，宛若峨眉半
空雪。誰者騷壇並擅名，孫郎似凱綵筆方縱橫。天台
作賦有家學，能吐光芒掩赤城。長安貴遊共杯酒，
嘖嘖新詩滿人口。未必時無賀監知歸來，且種先
生柳。扁舟訪我逢初夏，繞屋藤花坐其下。相對清
樽話別離，興酣岸幘商風雅。示我囊中一卷詩，蘭
陵侍御許青嶼唱和竒。浣花老翁有真嗜，苦心夫豈
窺藩籬。嗟乎大雅不復作，開元天寶銷亡却。古人
面目久失真，頓使千愁慰寂寞。寂寞讀君新詩淚不止。

念君何由至於此，趨庭授受有淵源。撫今感舊情
難已，湏洞風塵白日昏。文章小技未為尊，君家忠
孝傳來久莫忘。吹簫吳市門。

齋中獨坐

九十風光兩點催，碧梧翠竹亦佳哉。人難春老留
花住，天肯宵陰放月來。為酒有權思痛飲，防書成
悞懶嘗開。茅齋不減園林趣，隨意莓苔坐幾回。

拜龍洲道人劉改之墓

南渡偏安宋室卑，先生作客此棲遲。飄零湖海身
何託，恢復英雄志未衰。斷碣幾同淪漢水，芳蓀無

處薦湘纍墓門載拜傷心甚陵谷人間已屢移

送藻儒弟還朝

高堂置酒話離別結束征車待明發馳驅豈厭走
黃塵間澗終愁違白髮白髮衰親八十餘牽衣執
手重欷歔未應許國思迴馭須爲離家念倚閭遙
遙車馬之京國赤日炎蒸困行役歸夢江淮兩地
心客程齊魯千山色長安爲別已多時到日鳴珂
返鳳池鈴索聲從風外轉花磚影向日間移直廬
夜色秋將近前席知應時召問上苑遊將羽獵誇
後宮宴草清平進秋風奉使棘圍開竒士都收藥

籠回歐冶鑄皆成利器孫陽顧豈屬凡材迴翔禁
闥聲華重海內風塵驚瀕洞已見江湘戰壘橫更
聞關隴軍麾動索米艱難正憶君金戈鐵馬日紛
紛捷書屢望平淮信邊徼空馳喻蜀文 君王宵
旰緣何事此際乞身良不易膝下雖深負米情江
東且緩思蓴計獨憐憔悴一衰翁藥裏書籤淚眼
中四海烽烟憂汎梗三秋消息問來鴻況今門閤
雖無改兄弟窮愁幾人在君念萊衣未得還我嗟
姜被空相待雪裏蘆溝一騎飛傳柑時節望南歸
東園烟樹西田月暫解朝簪共釣磯

送徐健菴太史還朝八十韻

太史聲華重南州族望傳鳳生丹穴畔驥產渥洼
邊蕊榜收才子金門有謫仙致身非偶爾遇主豈
徒然凋瘵民生最經綸國是偏普天安衽席率土
止戈鋌水濶蛟龍雨風高鵬鶚天殷憂常耿耿此
志久拳拳賤子傷牢落明公忍棄捐嬉遊曾總角
壇坫每隨肩虎阜春宵月駕湖兩夜船笙歌殊雜
沓車馬更駢闐勝事南皮會名流曲水筵雷陳道
自合嵇呂契彌堅不覺雲泥隔俄驚歲月遷我方
詠團扇公已賦甘泉人地諸昆並飛鳴叔氏先策

名雙闕下臚唱五雲前鵬翮登高第龍頭屬少年
成均煩造就密勿賴周旋久自操冰鑑今將秉化
權我公尤挺拔與仲並騰騫甲第無高下詞曹正
接聯爐烟凝袖紫扇月向人圓鰲禁紆新綬螢窓
冷舊檀簪纓今日遇鉛槧夙生緣弟後蓬池宴兄
先杏苑韉恩深前席在句好奪袍鮮入院翻紅藥
移舟汎白蓮選場司校閱多士荷陶甄蔓草看除
矣狂瀾實障焉起衰文體正擢秀物情平秋至思
萼切歸來戲綵便堂開畫錦麗花映板輿妍築室
依山麓爲園損俸錢觀魚疏曲沼養鶴浴平川入

座青當戶開扉綠滿暝松間雲泚泚竹外水涓涓
國步何多難鄉園未穩眠重圍城屢陷苦戰敵仍
猿殺氣盈秦楚軍書達薊燕血流襄岷曲屍積隴
山巔將少當關固兵多棄甲遄請纓情已迫擊楫
志逾專短髮鬢鬢指回腸寸寸煎戒途行恐後趨
闕敢遷延驛路新秋鴈關門落日蟬寧辭穿虎豹
竊願效鷹鷂指畫情形中敷陳涕泗漣欖槍猶作
虐帝座許相纏潰卒收重整行師賀凱還事宜
師景谷功必繼澶淵綸閣輿情協沙堤物望懸一
身兼將相四海息烽烟列戟同王濬傳刀自呂虔

漫期公蹠躩轉念我迪邅老大儒冠誤紛紜世網
牽蓬蒿生滿逕風雨守殘編日到催租吏頻荒負
郭田賣絲情莫告剜肉病難痊門大堵尤困家貧
賦偶蠲承歡艱菽水垂老歷憂恟同氣看俱瘁謀
生計孰全兒啼賣書劍婦泣鬻釵鈿靜對生塵甑
閒吟逐鬼篇饑寒雖偪側騷雅足流連訪友朝聯
句尋僧夜問禪祇緣耽宿好豈謂悟真詮潦倒吾
何拙扶攜世有賢豎儒勞見憶當路幸垂憐謬賞
知吟苦能容恕語顛平津方朔米流水伯牙絃噓
植心恒切恩施感欲鐫固知慙駿骨差喜潤蝸涎

魚目驪珠混珊瑚鐵網牽論交心慘愴爲別淚潺
湲邈矣陳蕃榻雄哉祖逖鞭干戈塵黯黯道里草
芊芊圭華聊從素雲霄各勉旃路長情自邇莫恨
隔三千

讀易箒歌哭姜如農先生

遠聞姜給事死葬宛溪旁舊謫緣明主孤魂別故
鄉萬言輸鯁直一衲盡行藏從此宣城道江籬空
自芳

雪灘釣叟歌爲顧茂倫賦

吳綾作畫不盈尺上有一江秋水碧雨笠烟簑坐

釣翁泊舟相近天隨宅平田渺渺鷺飛白柳岍烏
犍背吹笛橋外山光山下山湖撥刺波跳魚尾赤釣
者今之玄真子作詩年來瘦欲死君家樵水畫作
殊下筆人將虎頭擬一詩一畫二妙并別有天地
漁樵裏君不見黃鵠磯頭戰鼓悲又不見金牛道
上征塵起英雄鬪爭未有已江山輸與漁翁耳朝
歌廢屠遊渭濱東漢故人卧富春豪傑往往隱於
此焉知釣者非其人雪灘之圖此意否烟波風月
供詩酒但願投竿得巨鱗放懷身世夫何有武陵
漁舟傳至今曲曲引入桃花深雪灘亦似武陵路

蘆中集卷二
中有仙源無處尋

送衛仲叔祖北行

未是悠悠者蹉跎乃至今千金傾俠客一諾重儒
林天地枯魚泣風塵老驥心無媒不須嘆前路有
知音

題楊水邨雪閣移梅圖

小閣移來雪一株暗香疎影繞庭隅分明占斷孤
山勝風月佳時放鶴無

蘆中集卷二終

